



Komunikadu Imprensa

27 Setembru 2012

Tribunál Distritál Baucau aplika pena suspensaun tinan ida ba autór krime violénsia doméstika

Iha 27 Setembru 2012 Tribunál Distritál Baucau hala'o julgamentu leitura sentensa ba arguidu Alarico Pinto ne'ebé mak Ministériu Públiku akuza nu'udar autór material ba krime ofensa ba integridade fízika simples ho natureza violénsia doméstika no krime ameasa hasoru vítima Anita da Costa Pinto.

Faktus sira ne'ebé prodús iha audiénsia julgamentu konviense tribunál hodi determina pena ba arguidu. Iha akuzasaun Ministériu Públiku nian haktuir katak iha 05 Outubru 2010, arguidu tuku dala rua iha vítima nia hasan loos hodi kauza vítima nia hasan bubu no kanek. Tuir fali iha 16 Janeiru 2011 arguidu kontinua ho tudik ameasa no tolok vítima.

Iha vítima nia deklarasaun haktuir katak, aktu ne'e arguidu halo beibeik ona hasoru vítima no nia família iha uma laran. Tanbá ne'e tribunál konvensidu katak arguidu komite ofensa ba integridade fízika simples ho natureza violénsia doméstika no krime ameasa tuir artigu 145 no 157 Kódigu Penál. Tribunál singulár konklui hodi hamonu pena prizaun fulan neen ba arguidu maibé suspende ba tinan ida. Iha kazu ne'e, tribunál mos kondena arguidu selu kustas judisiais hamutuk US\$. 40.00.-

Desizaun ne'e la refléta ba aktu ne'ebé arguidu komete no la eduka nia atu konsiente ba nia hahalok. Tanbá ne'e JSMP husu ba tribunál ne'ebé kompetente ba futuru tenki haree didi'ak sirkunstánsia hotu-hotu antes fó desizaun ba kazu hanesan, dehan Luis de Olivera Sampaio Diretór JSMP.

Juíz Dr. António Fonseca Monteiro mak prezide julgamentu ne'e. Dra. Benvida da Costa do Rosario representa Ministériu Públiku (MP) no arguidu hetan defeza husi Dr. Gregório de Lima husi eskritóriu Defensória Públiku.

Atu hetan informasaun kle'an, favor kontaktu:

Luis de Oliveira Sampaio

Director ezekutivu JSMP

Email: luis@jsmp.minihub.org

Landline: +670 3323883 ka +670 7295795